


東文選

百二十五

内閣文庫	
番號	漢 17777
冊數	130 (125)
函號	116 1









東文選卷之一百二十五

墓誌

高麗國重大匡僉議贊成事上護軍平壤君

趙公墓誌

李穀

惟昔世皇既一海內而懷柔異荒嘉我忠憲之歸  
欵忠敬之勤勞而行崇德報功之典迺釐降帝女  
于忠烈王其貳室之恩三接之寵天下無對焉當  
是時賢能並出奔走輔翼光大三韓之業貞肅趙  
公尤為傑然者也貞肅諱仁規官至僉議中贊封  
平康府院君既樹中興之功都上相之位以勲以



舊蔚爲元臣而諸子振振又皆克家功名富貴冠  
於一時公其季也公諱瑋字李寶平壤祥原人贈  
樞密院副使瑩之孫司宰卿致仕趙公溫呂之外  
孫管軍萬戶羅公裕之壻也生九歲以門功權務  
昌禧宮再遷攝護軍五轉大護軍歲庚戌拜密直  
左副代言四轉右代言乙卯除獻部典書明年以  
摠部典書行平壤尹事又明年出牧清州北界人  
多桀驚南方俗亦茲黠公壹以惠不以威期于無  
事聽訟之餘飲酒圍獵人始不知其德去乃思之  
延祐末忠肅王與潘王構釁或以間公授以元尹

置之散地事既定忠肅知其無它癸酉拜知密直  
乙亥遷判密直俄陞僉議贊成事時忠肅倦于政  
委之宰相公大體不務瑣尾發言侃侃人服其公  
謂有父風期以冢宰戊寅閏月以事免時宰相例  
寵襲封平壤已而忠肅捐國事隨以變公屏掃日  
與親故讌集至正改元之春樂禍者誣公與客論  
議國是求陵怒甚夜半下命貶福州牧衛使押送  
不許一刻留公倉皇出城馳赴任所意頗不樂稍  
覺傷和旣還疾作艱行步重語言百方莫醫丁亥  
秋進封府院君以病不謝戊子十一月乙巳卒于



家享年六十二夫人羅氏封通義郡夫人生男與  
門今爲少府尹孫男一人以明年三月己未葬于  
松林原將葬其兄元朝三藏法師旋公以墓誌屬  
予曰吾姪方萬里奔喪未暇匍匐以請吾弟之志  
予知之乞誌之又曰吾弟之德之行誠不愧于前  
人謂當一起以慰東人之望嗚呼今已矣夫又其  
亡雖丁國恤衆議謚以易名官庀事以會葬其德  
之感人如此盍銘諸穀諾而銘之曰

天之降材彌篤于人何以篤之有君有親貞肅之  
子忠肅之臣既能竭力又致其身予齒去角賦已

不鈞予德奪壽天或匪人我銘公墓其悲爲民措  
辭無愧刻此貞珉

高麗國匡靖大夫僉議評理藝文館大提學  
監春秋館事上護軍致仕尹公墓誌銘

公諱宣佐字淳叟鈴平郡人三韓功臣莘達之後  
莘達玄孫太師門下侍中瓘平戎拓地配享王廟  
瓘之孫太師門下侍中鱗瞻靖難匡國功在社稷  
鱗瞻生判禮賓省事宗海宗海生內庫副使世芳  
世芳生贈判司宰寺事應植應植生贈僉議評理  
均均取贈贊成事宋世堅之女於公爲考妣公生



而穎異七歲能屬文歲戊子擢第一人及第由金  
海掌書記入補秘書郎直文翰署累轉堂後官丁  
未忠宣王嗣政沙汰百寮拜左正言再轉右思補  
兼獻部散郎出按淮陽道累遷內書舍人選部議  
郎壬子按全羅道有古按轡持斧風事聞就陞都  
津令癸丑王遜位于忠肅王忠肅素聞其名授成  
均祭酒命掌符印在左右仍令進講資理通鑑轉  
監察執義中以事罷辛酉復職如初是年藩王得  
幸于英宗誣王以罪欲攘其位患得之徒皆附焉  
其黨十餘人忽自都下來言藩王已得國國人盍

狀王之非以達于朝乃連數十紙書其狀云云鋪  
于旻天寺門招百官而署之人爭趨之公獨曰吾  
不知吾君之非臣而訐君狗彘不爲唾之而去由  
是臺諫文翰得不署名事定中書以其狀歸之王  
數其不署者而嘆曰非尹某在憲司則其它未可  
知也時王被留五年財用匱乏藩王之黨知其然  
封府庫以沮輸運公檄察官趙瑄督責主者輸運  
乃行乙丑王歸國除判典校階通憲俄以民部典  
書出尹漢陽旣而王及公主如龍山謂左右曰尹  
尹清儉故使牧民汝曹慎毋擾溷辛未引年致仕



乙亥王親注守令至鷄林尹輟筆以思曰朝臣盈  
庭無如尹尹即注之其見信於王類此公再尹大  
府益廉益勤凡民之所病必務去而可以利民者  
舉行無遺丙子加僉議評理仍令致仕癸未九月  
某甲子得微疾呼子女而前曰今人之兄弟多不  
相能者由有爭也命子粲書文契均分家業且戒  
之曰和而無爭以訓汝子孫言畢正其衣冠端坐  
而逝以某月某甲子葬于北原享年七十有九夫  
人尹氏國學大司成諧之女生子三人長棣先公  
歿次粲及第今爲典儀寺丞女適大護軍庾良俊

繼昇平郡夫人朴氏生二男廕及第今爲通禮門  
祇候季剃髮學佛再繼林氏無子公平生不理家  
產性不飲酒人未嘗見其戲謔歌舞慎交遊重然  
諾獨居常若對賓唯以經史自娛有質疑者輒據  
經以對至于老莊之書刑名之學靡不研窮故學  
者多歸之詞翰清便正言以上常兼館職一時表  
牋多出其手既葬之七年前代言尹澤與余同年  
及第以所撰公行狀來乞墓銘曰嗚呼公雖姑夫  
恩猶父也適公歿吾在南方而未及葬葬期又迫  
而未暇銘銘人之墓如吾公乃可無愧而猶無銘



而至于今可恨也已子銘人多矣亦嘗有如吾公者耶余無辭以辭唯唯而銘之銘曰  
人以貧憂公以富羞或諂于君公以直聞孰尸厥爵爵劣于德德與齒尊公貴何言才名出衆蘄其見用見用之蘄公亦不愠赫赫者誰泯滅如澌公死猶生視此刻銘

漢陽府院君韓公墓誌銘并序 李仁復

公諱曰宗愈字曰師古漢陽人年十五入大學肄業卓然自樹立有聲未及冠舉進士擢第丙科延祐初由權知校勘選授藝文春秋館檢閱從毅陵

入朝錄行宮日曆且書批判文字既還以勞遷摠部散郎階承奉郎賜服六品歷都官直郎轉司僕副正知製教兼藝文應教春秋館編修官人以為稱職至治中群不逞誣毅陵以事徵在京師潘王與之相持使其人來曰我已得志矣國人頗惑焉公獨慨然欲為毅陵訟理乃與儒士之賢者十六人連名為書累數百言我祖文烈公躬至上京獻之丞相毅陵多歸功公擢為密直司左副代言泰定末毅陵為用事者所誤密以禪位表示公且曰吾欲以此與潘王趣行印公時為密直司知申事



固諫不得命既退托以墜馬不起與我文烈公以告大臣大臣謀諸王人執其用事者斥之事竟不行然亦以是失職至順之元永陵受命起爲密直提學明年加政堂文學典試貢士又明年毅陵復政公免歸其鄉築室以居至元之季毅陵薨曹頔構亂公至自鄉與我文烈公及諸大臣同侍永陵頔敗故政丞金公倫與公理其黨獄成驛聞丞相伯顏不省顧奏徵永陵赴都公等實從行至則俱繫獄事叵測我文烈公欲上書以明會伯顏死得解永陵既復位錄其功命爲僉議評理改贊成事

賜號推誠保節贊化功臣至正三年冬永陵西行使者稱制起公爲進奉使明年正月有詔奉明陵歸國且輔政由是拜僉議左政丞判軍簿司事上護軍加功臣號未幾進封漢陽府院君公於館職由應教編修累遷爲右文藝文二館大提學監春秋館事於階自承奉郎凡九轉至三重大匡既罷政歸卧其鄉非有事故或終歲不肯至王京令國王之未嗣位也諸老臣多屬望而公亦與焉王以是每見必加優禮十四年夏六月戊戌以疾卒于京城舊第疾革謂其子若壻曰吾繇布衣荷國重



恩官至極品縱不得中壽以沒亦復何恨吾於後  
三日當與若等別若等其候之至期果卒遠近聞  
訃者皆相吊以哭曰於虜大臣亡矣王爲之不視  
朝俾官理喪謚曰文節以其年八月壬寅葬于大  
德山禪寂寺之南原春秋六十又八曾祖諱元譔  
檢校太子詹事贈叅知政事祖諱彥東面都官判  
官贈同知密直司事考諱英密直副使上護軍致  
仕妣李氏咸安郡大夫人公瞻視異衆魁顏偉幹  
望之儼然知其爲公輔器其未達也與一時名士  
相還往群飲無虛日醉則起垂袖爲舞歌揚花詞

曰待如晦清風飛敷到黃閣中識者皆異之自檢  
閱至爲宰相常典銓選親戚故舊多賴公以達性  
寬厚且重處事接物皆有餘裕爲文章務去世俗  
氣尤致意於詩又喜談笑樽俎間和氣油然而可愛  
而親復齋其自號也初李文定公一見於大學遂  
以其子駕洛君諱瑄之女配之生子男三人曰伯  
淳曰仲明曰季祥子女五人云云及葬伯淳等相  
與謀曰吾先公所與共事者惟文烈李公爲詳其  
孫仁復嘗事二公聞見有素而今爲太史氏是能  
道吾先公事業垂之無窮者也乃來請銘銘曰



器偉且宏學博名成何用不臧歷事三君以忠以勤蟬冕有章啓慶自躬善始今終維德之光埋石於墳我銘以文來者可忘

鷄林府院大君贈謚正獻王公墓誌銘 并序

至正己丑春有國大臣僉議政丞王公入賀聖節于京師秋七月癸巳還至昌義縣以疾卒遼東部使者傳歸其柩士大夫皆相弔街童巷婦莫不驚嘆四方之民至有痛哭者王於是贈謚曰正獻公命有司董喪事如禮以九月辛酉葬于臨津縣栢木谷之原前事之三月金海府院君益齋李公召

謂仁復曰嗚呼王郡公吾先室之弟吾尚忍銘耶子其最行事之大者刻諸石藏之則猶吾銘也仁復嘗辱公知其可以不文辭謹案公慶尚道福州人曾大父諱躉判大僕事翰林學士大父諱胆僉議中贊判典理司事致仕謚文清父諱溥永嘉府院君謚文正母柳氏卞韓國大夫人公生於大德丙申爲兒寡言笑絕嬉戲且不類諸昆季韓國以爲異其伯兄吉昌君受知忠宣王王問其兄弟聞公名則喜未及見受以郎將俄遷三司判官年十四五從事鞅掌同列奇之歲辛亥王自都召公一



見遂以爲子慈愛兼至癸丑夏從王還國常同車  
由司僕副正轉司憲執義明年陞爲三重大匡鷄  
林府院君書之王族譜王還朝奏以爲皇太子東  
古赤爵雞林郡公階資德大夫即都下買田宅以  
賜英宗初宦者伯顏豆古思有寵構王王獲譴西  
行公一心翼翼欲以身代帝聞而憐之宦者不能  
害癸亥冬與門客兩三輩將詣王所道見使者西  
去與語使者喜曰吾奉詔迎王來矣吾當巡諸路  
恐晚公宜先報因與驛三騎公兼行至臨洮見王  
旣而使者適會遂陪至京師泰定帝踐祚之初也

時忠肅王以留未歸潘王內懷覬覦詭計百端而  
王無所可否左右多反覆公獨以義自將終始無  
間言乙丑夏五月王薨斬衰麻經奉喪東來旣葬  
每月朔望私祭陵下至歿身又修其傍海安寺以  
奉冥福王嘗泥金銀書六百般若經未半及他經  
亦衆公用私錢畢其功自王之薨垂二十年未有  
謚公入朝請王謚并請謚忠肅王柄國者莫小助  
公自以爲已責所費無算卒得請甲申秋韓國棄  
世其冬先國王起公爲僉議右政丞而求嘉君尚  
無恙強之再三不得已起視事首以選法歸之典



理軍簿舊判官吏祿薄賜京畿田人若干畝謂之  
祿科權貴奪之幾盡諸領府尤受其害公下令復  
之賢有才行者力佑之其奸回貪暴不忍與之言  
由是未久見罷丙戌冬有詔召至闕下委以整理  
其副京兆相執已見恥與校朝士來詰獨委公其  
事戊子春復爲政丞京城大饑揚廣西海尤甚公  
發廩賑濟所全活不可勝計公爲人剛靜莊重魁  
顏脩幹望之毅然不可犯而城府機穽則無之平  
生不妄言讀書不甚多而通大義能言先賢事業  
好接賓客雖下士必待之盡禮性廉簡寡欲侍忠

宣王有年未嘗以事私謁前後在位三年舉賢才  
恤民隱節浮費凡可以興利除害者無所不用其  
極非宴會退朝則必齋居慨然念國家或不知其  
食味內而臺諫外而守令多承風礪節橫政暴賦  
一不及民流亡以歸其爲整理也詞訟蠶午一斷  
以法雖親戚故舊不小貸其大公至正蓋天也  
也嗚呼若公者可不謂大臣乎公配洪氏宰相誥  
之子女適上國監察御史上左男重貴郎將尚未  
冠公本姓權氏諱載改姓名曰王煦忠宣王所賜  
也又小字曰脫歡銘曰



於維我公關盛衰生自岳降死騎箕德人之容吉人  
辭妙齡深結忠宣知視猶已出愛且慈教我誨我式  
似之恩榮兩國崇班資忠孝始終無所虧好賢樂善  
心孜孜再起爲相能救皆天子有詔釐東陸獨持國  
是終無疑砥柱不動頽波馳大廈更賴一木支伊尹  
其任廉公儀積者已百纜一施何天不弔遽奪歸子  
產已矣君子悲惟公功德古亦稀有欲徵之銘在斯  
高麗故輸誠秉義協贊功臣重大匡都僉議  
贊成事商議會議都監事進賢館大提學知  
春秋館事上護軍贈謚文溫公閔公墓誌銘

并序

李達衷

余少遊大人先生之門獲侍話言每論士風必歔  
歔嘆息曰今不如昔余竊以謂固矣何必爾旣閱  
事多姑信其爲然也前輩風流日以淪謝顧寥寥  
無所矜式則求舊之懷隨感而興可勝歎哉余於  
及菴公深有族姻情好之敦故其卒痛悼滋甚而  
夫人銘墓之請再至則敢以陋辭焉公諱思平字  
坦夫號及菴忠州驪興人考諱頤匡靖大夫密直  
司使進賢館大提學知春秋館事上護軍謚文順  
妣金氏宣授鎮國上將軍管高麗軍萬戶重大匡



上洛君金忻之女封永嘉郡夫人祖諱宗儒重大  
匡都僉議贊成事上護軍判摠部事致仕謚忠順  
曾祖諱混朝散大夫戶部侍郎蓋其先世種德滂  
仁培植悠久自九代祖諱稱道奉御公而下代有  
碩輔其功烈位號磊落相望家有譜國有史略而  
不書公生於元貞乙未十二月戊辰五歲而喪妣  
長子忠順資超然有器度大宰金貞烈公素號知  
人妻公以女貞烈喜賓客一時名勝多從之游因  
有所觀感學日進試補奉先庫判官轉右列爲散  
員加別將且不樂虎資讀書益力延祐乙卯吾東

菴文定公主禮闈考閱甚精所取不滿常額選無  
匪人公中之由是學問優游十年之久時毅陵公  
於上國至泰定乙丑正位東還慎簡庶僚公拜藝  
文春秋二脩撰歷左右二正言獻納服賜銀緋金  
紫視其品庚午永陵即位頗不喜儒苟非有得於  
中者惟虎是効爲之媚悅公時以軍簿正郎藝文  
應教亦出入王府與議選授其操守不小變至順  
壬申毅陵復位大明黜陟公拜衛尉少尹知製教  
階奉善丙子加奉常以版圖摠郎出爲慶尚道監  
鍊使民便之召以典校副令右文館直提學復版



東文選 卷一百二十五 十三  
圖摠郎館職改藝文進成均祭酒遷左司議大夫  
階以中顯陞中正館改進賢出爲全羅道按廉使  
惠化敦洽入拜成均大司成充春秋館脩撰官由  
正順進奉翊至正壬午以判典校掌成均試取金  
仁瑄等九十三人甲申明陵即政授典理判書轉  
監察大夫乙酉入密直爲提學帶上護軍歷副使  
知司事明年封驪興君越己丑聰陵入朝公從之  
既踐位以其勞授僉議參理藝文館大提學知春  
秋館事號輸誠秉義協贊功臣進贊成事商議會  
議都監事退而閑居者八年至正己亥年六十五

秋七月戊申病卒于私第訃聞上嗟悼賜謚曰文  
溫公於戲公奕世衣纓事業昌熾未嘗略有矜色  
性資溫雅處親姻雍容敦睦雖有拂戾不以爲言  
終必赧服善交游嘗與拙齋崔先生友善尤篤喜  
其文出力刊行其敦信樂善類如此居官處事不  
爲崖異一循義理而已率以詩酒自娛坦蕩蕩君  
子人也以公觀之未必士風今不如昔公旣歿矣  
所遇日新則余亦不覺歛歎歎息曰今不如昔此  
余所以信其大人先生之言爲然也生一女適世  
家子弘福都監判官金昂孫男二人公愛之教養



有方皆登科曰齊閔德寧府注簿曰齊顏直翰林  
院孫女四人長適世家子監門衛參軍事金士安  
餘皆未筭齊閔昆季主喪盡禮是庚申葬于大德  
山感應寺之南麓其銘曰

如公之裕如公之粹人所歆兮靡底于者靡胤厥  
後天難謀兮有女之懿有甥之美慰我心兮詩有  
昔未文有高致俾余長吟兮中而不倚群而不類  
一以惋兮念言宛爾於乎已矣嗟歲月之駸駸兮

東文選卷之一百二十五



